

Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersoq.

(Aningaasanut killigititassanik iluarsineq, atuuffinnik erseqqissaaneq, siumoortumik neqerooruteqartitsinani aamma isumaqatigiiffiusumik neqerooruteqartitsinani suliariumannittussarsiuussisarnissamik piumasaqaatit pillugit aalajangersakkat, siumoortumik nalunaaruteqartarnissamik atuutsitsilerneq kiisalu Neqerooruteqartitsisarnermut Maalaaruteqartarfik pillugu aalajangersakkanik atorunnaarsitsineq)
(Ineqarnermut Attaveqatigiinnermullu Naalakkersuisoq)

Pillugu

Sanaartornermut ataatsimiititaliap

ILASSUTITUT ISUMALIUTISSIISUTAA

Siunnersuutip aappassaanneqarnerani tunniunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Aqqaluaq B. Egede, Inuit Ataqaatigiit, siulittaasup tullia
Inatsisartunut ilaasortaq Erik Jensen, Siumut
Inatsisartunut ilaasortaq Nikkulaat Jeremiassen, Siumut
Inatsisartunut ilaasortaq Pele Broberg, Partii Naleraq

UKA2020-mi ulloq 7. oktober 2020 siullermeerinninnerup kingorna siunnersuut ataatsimiititaliamit misissorneqarpoq.

1. Siunnersuutip siunertaa imarisaalu

Inuiaqatigiinni ineriartornermut naapertuuttunngortinniarlugu siunnersuuteqarnermi matumani neqerooruteqartarnermut inatsit allanngortinniarneqarpoq. Neqerooruteqartarnerup ingerlanneqartarnerata eqaallinneqarnissaa akikinnerulernissaalu inatsimmi siunertarineqarpoq. Neqerooruteqartartut sanaartugassatut pilersaarutiminnik siumoortumik nalunaaruteqartarsinnaanissaasa periarfissaalernissaa ilaatigut siunnersuutigineqarpoq.

Suliassanut isumaqatigiiffiusumik neqerooruteqartitsinani aningaasanut killigititassat maannakkut 500.000 kr.-niit 1.500.000 kr.-ninet qaffanneqarnissaat siunnersuummi aamma ilaatinneqarpoq. Sulianut aningaasanut killigititassat 300.000 kr.-niit 500.000 kr.-ninet qaffanneqarnissaat siunnersuutigineqarpoq. Taamaalilluni katillugit 500.000 kr.-nit inorlugit nalilinnut suliassanut neqerooruteqartitsinissaq pisussaaffiujunnaarpoq.

Naggataatigut sanaartornerup iluani suliariumannittussarsiuussinerit pillugit maalaaruteqartarnerit siunissami Pisortani Pisiniartarnernut neqerooruteqartarnermut maalaaruteqartarfik pillugu Inatsisartut inatsisaat malillugu suliarineqartarnissaat siunnersuutip malitsigissavaa.

2. Tusarniaanermut akissutit

Siunnersuut ulloq 17. december 2019-miit ulloq 21. januar 2020-mut tusarniaassutigineqarpoq. Tusarniaassummut akissutit inatsisissatut siunnersuummut ilanngunneqarput, tamannalu Inatsisartut Siulittaasoqarfiata iluserissatut piumasaqaataanut naapertuuppoq.

Naalakkersuisut ulloq 9. januar, illuatungerisatut susassaqtut tusarniaassutigineqartunik tamarmik tigusaqarsimanninneri erseqqissaassuteqarfigineqarsimammata ataatsimiititaliamit oqaatigineqassaaq. Tamanna tunngavigalugu 2020-mi piffissami 9. januarimiit 21. Januarimut tulliuuttut tusarniaanermut akissuteqarnissamut periarfissalerneqarput:

- INI A/S
- Mittarfeqarfiit
- Nukissiorfiit
- Iserit A/S
- Nuuk City Development A/S
- Royal Greenland A/S
- Tele Greenland A/S

Ataatsimiititaliap aallarniutigalugu oqaatigissavaa, Naalakkersuisunit tusarniaassutit illuatungerisatut tusarniaaffigisassatut puigorneqarsimasunut nassiussisimanerat pitsaasutut isigineqarmat. Oqartussat, suliffeqarfiit aamma kattuffiit tusarniaanermi suliaqarfimminni tamarmik immikkut assigiinngitsunik ilisimasaqarnerat misilittagaallu pingaaruteqartut ilanngunneqartarnissaat siunertaavoq. Tamanna tunngavigalugu sukkulluunniit naapertuuttumik naammaginartumillu tusarniaasoqartarnissaa tamatigut qulakkeerneqartarnissaa pingaaruteqarpoq.

Naalakkersuisut inatsisissatut siunnersuummi matumani siunnersuutip kinguartinneqarnerata ajoqtai tusarniaaffissallu tusarniaanermi sivikinnerusumik piffissaqtunut ajoqutaanut innersuussuteqarnerat Ataatsimiititaliamit tusaatissatut tiguneqarpoq.

3. Apeqqutit

Ataatsimiititaliap siunnersuummik suliaqarnermini atugassaminik Ineqarnermut Attaveqaqatigiinnermullu Naalakkersuisoq qinnuigaat apeqqutinik arlalinnik akissuteqaqqullugu. Ataatsimiititaliap apeqqutai Ineqarnermut Attaveqaqatigiinnermullu Naalakkersuisup akissutai isumaliutissiisummut uunga ilanngussatut 1-tut aamma 2-tut ilanngunneqarput.

Ilanngussami 1-mi apeqqutit pingasut qulaajarniarneqarput. Tusarniaanermi tusarniaaffigineqartussat tamarmik ilanngunneqarsimanersut tamannalu qanoq ingerlanneqarsimanersaq ataatsimiititaliamit apeqqutigineqarput. Tamatuma saniatigut siunnersuummi taaguusersueriaatsit atorneqartut pillugit itinerusumik nassuiaatigineqarnissaat ataatsimiititaliamit apeqqutigineqarput. Killilimmik suliariumannittussarsiuussisoqartitsilernerup atulernerqarnerata kingunissai inaarutaasumik ataatsimiititaliamit apeqqutigineqarput.

Ilanngussami 2-mi killilimmik suliariumannittussarsiuussinerup atulernerqarneratigut pissutsit qanoq inneri itinerusumik apeqqutigineqarput. Siumoortumik nalunaaruteqartarnissap atorneqarneranut neqerooruteqartunillu naligiisitsineq ukkatarineqarneranut apeqqutit tunngassuteqarput.

4. Ataatsimiititaliap siunnersuummik suliaqarnera

Siunnersuutip siullermeerneqarnerani amerlanerussuteqartunit pitsaasumik tiguneqarsimanagera Ataatsimiititaliamit maluginiarneqarpoq.

Ataatsimiititaliap paasivaa, siunnersuummit neqerooruteqartitsisarneq eqaallisaaffiginiarneqarnera siunnersuummit siunertarineqarmat, ilaatigut neqerooruteqartartunut sanaartugassanik siumoortumik nalunaaruteqartarnermik periarfissiinikkut. Siunertaq tamanna Ataatsimiititaliamit naammaginarinneqarpoq. Siumoortumik nalunaaruteqarlutik neqerooruteqartunik qanoq naligiisitsinissamik qulakkeerinninniartoqarsinnaanera ataatsimiititaliamit siunnersuummik suliaqarnermini nangaanartoqartinneqarpoq. Tamanna immikkoortoq 4.3-mi suliarineqarpoq.

Kommunit suliffeqarfiutai, kommuninit aalajangiiniarnermi sunniuteqarfigninnaasaat, maannakkut inatsimmut ilanngunneqarmat Ataatsimiititaliamittaaq aamma naammaginarinneqarpoq. Kommunit marluk tusarniaanermut akissuteqaataannit taassuma ilanngunneqarneranut tapersiissuteqarnerat atuarneqarsinnaavoq.

4.1. Paasinninnermik qulaajaaneq

Inatsimmi oqaatsit atorneqartut assigiinngitsunik paasineqarsinnaasut ataatsimiititaliap paasivaa. Pingaartumik tamanna § 13, imm. 2-mut tunngavoq:

*”Imm. 2. Aammattaaq killilimmik suliariumannittussarsiuussinerit siumoortumik neqerooruteqartitsiviunngitsumik ingerlaneqarsinnaapput, nunap immikkoortuani pissutsit peqqutaallutik **entreprenørit najugaqartut** kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamat § 25 a, imm. 4 naapertorlugu aggersaasoqarsimatillugu.”*

(Ataatsimiititaliap erseqqissaanera)

4.1.1. Entreprenørit najugaqartut aamma entreprenørit avataaneersut:

Nalornissutaasinnaasut qulaajarnissaat siunertaralugu Ineqarnermut Attaveqaqatigiinnermullu Naalakkersuisumut Ataatsimiititaliaq apeqqutinik nassiussaqarpoq. Naalakkersuisup akissuteqarnermini ilisimatitsissutigaa, entreprenøri nunaqavissuq tassaasoq:

”Inatsisissatut siunnersuummi entreprenøri, sumiiffimmi aalajangersimasumi, tassalu illoqarfimmi nunaqarfiinilu ulluinnarni suliaasaqarfimmut attuumassuteqartoq tunngaviusumik najugaqavissuuvoq.”

Akissuteqarnermi tassani entreprenørit avataaneersut pillugit allapput:

”Inatsisip teknikkimut tunngasortaanut oqaaseqaateqarnermi entreprenørit avataaneersut oqaatigineqarnerini, taamaallaat entreprenørit najukkami najugaqanngitsut eqqarsaatigineqarput. Tassalu entreprenøri avataaneersuq matumani tassaavoq entreprenøri illoqarfimmit allameersuq, entreprenøritut najukkameersutut illoqarfimmi (nunaqarfiinilu) illuliorfiusussami sanaartorfiusussamilu najugaqartuunngitsutut isigineqartoq.”

Siuliini taaneqartut tunngavigalugit siunnersuummi § 13, imm. 2-mi entreprenørit sorliit pineqarnermut naammattumik ersarissarneqarsimasuq Ataatsimiititaliaq isumaqarpoq.

4.1.2. Nunap immikkoortuani pissutsit

’Nunap immikkoortuani pissutsini’ suut pineqarnermut aamma nunap immikkoortuani pissutsini killilimmik suliariumannittussarsiuussinissami periarfissanut qanoq sunniteqarsinnaaneri aamma Naalakkersuisut ilisimatitsissuteqarput:

”Nunap immikkoortuani pissutsinut tunngatillugu pissutsit nalinginnaasut aammalu immikkut ittut, sumiiffimmi pineqartumi ilisarnaataasut allaaserineqarput. Inatsisissatut siunnersuummi nalinginnaasumik sumiiffimmi siunnerfiusumi sanasut entreprenørilla suliffeqarfiisa akornanni niuernermit unammilleqatigiinnermilu pissutsit siunnerfigineqarput. Nunap immikkoortuani

pissutsit allat, sumiiffimmut, illuliornissamik sanaartornissamilluunniit ingerlatsiviusussamut immikkoorutaasut, aammalu entreprenørip sanaartornissaanut soorunami sunniuteqarsinnaasut pineqarput.”

Tamanna tunngavigalugu paasissutissat naammattumik qulaajarneqarsimasut Ataatsimiititaliamit isumaqarfigineqarpoq.

4.2. Isumaqatigiiffiusumik neqerooruteqartitsineq

Ataatsimiititaliap paasinninnera malillugu, allaffissornikkut sulineq siunnersuutip § 20 imm. 1 nr. 4-kkut oqilisarniarneqarpoq, aalajangersakkamimmi tassannga amerlanerpaamik suliffeqarfiit pingasut sanaartugassaq suliarisinnaappassuk isumaqatigiiffiusumik neqerooruteqartitsisoqarsinnaalissammat. Sanaartugassat annikinnerusut neqerooruteqartitsivigineqartariaqannginnissaat tassungalu pisortat aningaasartuutissaraluanik sipaartoqarsinnaanera ataatsimiititaliamittaaq pitsaasutut isigineqarpoq.

Siuliini taaneqartut tunngavigalugit isumaqatigiiffiusumillu neqerooruteqartitsinani killigitinneqartunik qaffaaneq avinngarusimasuniittut pitsaanagerusumik inissisimalernissaattut, ataatsimiititaliamittaaq isumaqarfigineqarpoq. Taanna 500.000 kr.-niit 1.500.000 kr.-nintut qaffanneqassaaq.

4.3. Killilimmik suliariumannittussarsiuussinerit

Ataatsimiititaliap siunnersuutip §13 imm. 2-mut tunngatillugu entreprenørit aalajangersimasut kisimik neqerooruteqarsinnaanissaat naatsorsuutigineqartillugu, siumoortumik neqerooruteqartitsinani killilimmik suliariumannittussarsiuussinerit nunap immikkoortuani pissutsit peqqutaallutik entreprenørit ataasiakkaat kisimik neqerooruteqartillugit ingerlatsinissaq periarfissanngortinneqarpoq. § 25 a, imm. 4 malillugu siumoortumik nalunaaruteqartitsisoqarsimanissaa aalajangersakkami piumasaqaataavoq, suliaasat tamanut neqerooruteqartitsissutaallutik ingerlanneqartarnissaannik neqerooruteqartitsisarnermut inatsimmi piumasaqaataasut taamaalillutik eqquutsinneqarput.

Aalajangersakkami neqerooruteqartitsineri ingerlatsinernik eqaallisaaneq annertuumik unammillerfiunngitsuni periarfissanngortinneqarpoq. Suliariumannittussarsiuussineri suli akikinnerpaaq imaluunniit neqerooruteqartuni aki pitsaanerpaaq, neqerooruteqartuni pitsaassuseq ilanngullugu nalilersorneqartarnissaa Ataatsimiititaliamit tamassumunnga atatillugu qinerneqartarnissaat isumaqarfigineqarmat erseqqissaassutigineqassaaq.

4.3.1. Killilimmik suliariumannittussarsiuussinerit kingunissai.

Siunnersuummi Nr. 4-mut tunngatillugu § 13-mi killilimmik suliariumannittussarsiuussinerit atulernerani ataatsimiititaliap suliffeqarfiit ajornerusumik atugaqalinnginnissaasa qulakkeerneqarnissaat siunnersuummik

suliaqarnermini sammivai. Suliaqarnermi tassani Ataatsimiititaliap Ineqarnermut Attaveqatigiinnermullu Naalakkersuisoq killilimmik suliariumannittussarsiuussinerit kingunerisinnaasai allaasereqqullugit qinnuigineqarpoq. Akissutit ilanngussa 1-mi atuarneqarsinnaapput. Naalakkersuisut ilisimatitsissutigaa:

“Neqerooruteqartitsisup siunnersuummi nr. 6 naapertorlugu siumoortumik nalunaaruteqartarnissamut piunasaqaat isiginiarsimappagu, tamanna inatsisissatut siunnersuummi siumoortumik neqerooruteqartitsinngikkaluarluni killilimmik suliariumannittussarsiuussinissamut periarfissiisoqarnera suliffeqarfinnut taamatullu neqerooruteqartunut isumaqartussaangilaq. [...] Inatsisissatut siunnersuummi tamanut ammasumik siumoortumik neqerooruteqartitsinngikkaluarluni killilimmik suliariumannittussarsiuussinerup imaluunniit neqerooqqusinerup atorneqarsinnaaneriniq annertusititsinissaq siunertarineqanngilaq.

“Siunnersuummi nr. 4-mi aalajangersakkami (§ 13, imm. 2-mik allanngineq) nunap immikkoortuani pissutsit pequtaallutik entreprenørit aalajangersimasut – pingaarnertut entreprenørit najugaqavissut – kisimik suliassamik naammassinnissinnaanerat qularnaateqanngitsutut isigineqartillugu siumoortumik neqerooruteqartitsinngikkaluarluni killilimmik suliariumannittussarsiuussisoqarsinnaanissaa siunertarineqarpoq.

“Siunnersuut malillugu taamatut killilimmik neqerooruteqartitsineq (siumoortumik neqerooruteqartitsinertaqanngitsumik) neqerooqqusinerlu, tamanna pillugu siumoortumik nalunaaruteqartoqarsimappat taamaallaat atorneqarsinnaavoq. Tassalu siumoortumik nalunaaruteqartarnermi ersarissumik pissusilersornissaq eqqarsaatigineqarpoq, tassungalu tunngatillugu maalaaruteqartoqarsinnaammat erseqqissaatigineqassaaq”

Killilimmik suliariumannittussarsiuussisarnerup annertusarnerani neqerooruteqartitsisarneq eqaannerusoq inuiaqatigiinni pissutsinut annertunerusumik naleqqussarneqartoq periarfissanngussasoq Naalakkersuisut akissuteqaataat tunngavigalugu ataatsimiititaliap paasivaa.

Siumoortumik nalunaaruteqartoqarsimatillugu neqerooruteqartunik qanoq ililluni siumoortumik neqerooruteqartut naligiimmik sullinneqarnissaat qulakkeerneqassanersoq Ataatsimiititaliamit ernummatigineqarsimavoq. Qanoq ililluni neqerooruteqarnissamut soqutiginnittut neqeroorsinnanissaannik qulakkeerneqassanersut aamma qanoq ililluni neqerooruteqarnissamut soqutiginnittut maalaaruteqarsinnaanissaat qulakkeerneqassanersoq Ataatsimiititaliap suliamik suliaqarnermini pissutsit marluk taakku suliarivai. Tamanna itinerusumik tulluuttuni suliarineqassaaq.

4.3.2. Siumoortumik nalunaaruteqareernerup kingorna neqerooruteqarsinnaanermut periarfissat

Sulisitsisut (GE) tusarniaanermut akissutaannit siumoortumik nalunaaruteqartitsisoqartitsisoqarnerani neqerooruteqarnissamut soqutiginnittut qanoq inissisimanerat qulaajarneqarnissaat ataatsimiititaliamit pisariaqartinneqarpoq. Sulisitsisut tusarniaanermut akissutiminni allapput:

“Neqerooruteqarnissamut soqutiginnittut, tk. § 25 a, imm. 5, neqerooruteqartunik itigartitsinissamut tunngavigissallugu naammangitsaq Sulisitsisut naliliipput. Soqutiginninnerminnik saqqummiussisimasut tamarmik inatsisitigut piumasaqaateqarsinnaanermut pisinnaatitaaffeqartariaqarnissaat tamanna tunngavigalugu nalilersorneqartariaqartoq Sulisitsisut naliliipput.”

Siunnersuummi siumoortumik nalunaaruteqartoqareernerata kingorna inatsisitigut neqerooruteqarsinnaanermut periarfissaqartitsineq ilanngunneqarsinnaanersoq qulaajarniarlugu Ineqarnermut Attaveqaqatigiinnermullu Naalackersuisumut ataatsimiititaliaq tamanna tunngavigalugu apeqqutinik nassiussaqarpoq. Apeqqutit taakkua akissutaallu ilanngussaq 2-mi takuneqarsinnaapput.

Ineqarnermut Attaveqaqatigiinnermullu Naalackersuisup paasinninnera malillugu, inatsisitigut neqeroornissamut pisinnaatitaaffiup malitsigissavaa neqerooruteqarnissamut soqutiginnisinnaasut siumoortumik nalunaaruteqarnermi soqutiginninnerminnik nalunaaruteqartarunnaarnissaat. Tassunga oqaatigineqassaaq, ammasumik neqerooruteqartitsinermi neqerooruteqartup aningaasaqarnikkut patajaatsumik pisortanullu akiitsoqannginnera piumasaqaatigineqartarmat. Ineqarnermut Attaveqaqatigiinnermullu Naalackersuisoq allappoq, inatsisiliornermi neqerooruteqarnermi inatsisitigut piumasaqaat ilanngunneqassappat malitsigissagaa, neqerooruteqarnissamut soqutiginnisinnaasut ilaatigut nassiuttalissagaat:

- akileraartarnermut Aqutsisoqarfimmiit nalunaarut, pisortanut amerlasuunik akiitsoqannginnermut uppersaataasoq, ilaatigut
- aningaaserivimmit assigisaannillu nalunaarut, pineqartup suliassap sularinissaanut qularnaveqqusiisnaanerani naliliiffiusoq.

Ineqarnermut Attaveqaqatigiinnermullu Naalackersuisoq aaammattaq allappoq:

”[...] taamatullu inatsisitigut piumasaqarsinnaaneq tunngavissanut, maleruagassani atuuttuni siumoortumik neqeroortitsinertaqanngitsumik neqerooqqusinertaqanngitsumillu killilimmik sulariumannittussarsiuussinissamut nammattuusunut tamakkiisumik naapertuuttutut isigineqanngillat.

Siumoortumik nalunaaruteqarnermi inatsitigut piunasaqarsinnaaneq atuuttussanngortinneqarpat neqerooruteqarnissamut soqutiginnittut suliaassamik annertunersitsissasoq ataatsimiititaliaq isumaqarpoq.

Neqerooruteqartisisarnermi periutsinik eqaallisaaniarnermik siunertamut tamanna akerliusoq Ataatsimiititaliaq isumaqarpoq.

4.3.3. Neqerooruteqarsinnaasunik maalaarnissamut periarfissat

Neqerooruteqarnissamut soqutiginnittut neqerooruteqartoqarsimaneramik paasisaqarnissaat tamatumalu kingorna siumoortumik nalunaaruteqartoqareerneratigut isumaqatigiissuteqartoqarsimaneramik ilisimasaqalertariaqannginnerannik siunnersuutip matuma ataatsimiititaliamit suliarineqarnerani ernumassutigineqarpoq.

Ineqarnermut Attaveqaqatigiinnermullu Naalackersuisup paasinninnera naapertorlugu siumoortumik nalunaaruteqartarnermik ingerlatsinerup neqeroornissamut soqutiginnittunut neqeroortitsinerup ingerlaneramik paasissutissanik pissarsinissamut periarfissaannik pitsanngorsaataassaaq.

Ataatsimut isigalugu maalaartoqarsinnaaneramik siunnersuut annertusisitsisoq ataatsimiititaliaq isumaqarpoq, siumoortumimmi nalunaaruteqartoqarnerani maalaartoqarsinnaanera periarfissaqartinneqalernissaa qulakkeerneqassamat.

5. Siunnersuutip aningaasatigut allaffissornikkullu kingunerisassai.

Siunnersuutip piviusunngortinnissaanut aningaasatigut allaffissornikkullu kingunerisinnaasai siunnersuummi nalinginnaasumik oqaaseqaatini allaaserineqarput. Tassani allassimavoq, pisortanut, inussutissarsiortunut innuttaasunullu siunnersuut aningaasatigut allaffissornikkullu kinguneqarnaviangitsoq. Neqerooruteqartitsisarnermik ingerlatsineramik eqaallisaaneq pingaarnerusutigut pisortanut inussutissarsiortunullu pitsaaqutaassasoq pingaartillugu nalilerneqarpoq.

6. Ataatsimiititaliap inassuteqaataa

- Amerlanerussuteqartut Siumut, Demokraatit aamma Partii Naleraq siunnersuutip akuersissutigineqarnissaa inassutigaat.
- Ikinnerussuteqartut Inuit Ataqtigiit siunnersuutip itigartinneqarnissaa inaassutigaat

Siunnersuutip pingajussaaneerlugu suliarineqannginnerani ataatsimiititaliamit suliarineqartussanngorlugu innersuunneqarnissaa ataatsimiititaliamit innersuussutigineqarpoq.


Taamatut oqaaseqarluni siunnersuummilu allassimasutut paasinnilluni matumuuna
ataatsimiititaliap siunnersuut aappassaanniigassanngortippaa.



Justus Hansen
Siulittaasoq




Pva. Aqqaluaq B. Egede
Siulittaasup tullia



Erik Jensen



Pva. Nikkulaat Jeremiassen



Pele Broberg



Inatsisartut Sanaartornermut Ataatsimiititaliaat
/ maani

27-10-2020

Suliaq nr.: 2020 - 2673

ID nr. 58041603

**Illuliortiternermi sanaartornermilu neqerooruteqartitsisarneq pillugu Inatsisartut
inatsisaata allannguutissaanut siunnersuut pillugu Ataatsimiititaliap
apeqquteqaataanut akissutit (UKA 2020/23)**

Postboks 909

3900 Nuuk

Tlf.: (+299) 34 50 00

E-mail: box909@nanoq.gl

Fax: (+299) 34 63 56

www.naalakkersuisut.gl

Tusarniaanerup ingerlanera pillugu

Apeqqut 1. INI A/S-ip saniatigut kikkut aamma puigorneqarsimappat?

– *Tusarniaanermi akissuteqaatini, Naalakkersuisut tusarniaanernut iserfissiaanni takuneqarsinnaasuni INI A/S-ip akissuteqaataani allassimavoq, tusarniaaffiusunut ilaasutut puigorneqarsimallutik. Aamma allapput, tusarniaaffiusussat allat taamatut pineqarsimasut.*

Akissut: INI A/S-ip e-mail-ikkut, 9. januar 2020-meersukkut ingerlatseqatigiiffik tusarniaanermi najoqqutassanik tigusaqarsimanani Naalakkersuisoqarfimmut nalunaarutigimmagu, tamanna tunngavigalugu Naalakkersuisoqarfik naliliivoq, ingerlatseqatigiiffiit uku aamma tusarniaaffissatut naleqqutissasut:

- Mittarfeqarfiit
- Nukissiorfiit
- Iserit A/S
- Nuuk City Development A/S
- Royal Greenland A/S
- Tele Greenland A/S

Tusarniaanermi najoqqutassat ulloq taanna elektroniskimik ingerlatseqatigiiffinnut matuma siuliani taaneqartunut tamanut nassiunneqarput.

Tassunga tunngatillugu erseqqissaatigissavara, tusarniaanermi najoqqutassat elektroniskinngorlutik Naalakkersuisut tusarniaanernut iserfissiaatigut 17. december 2019-imi tamanut ammasumik takuneqarsinnaalermata, tassanilu tusarniaanermi akissuteqarnissamat 21. januar 2020 killiliunneqarpoq.

Tamatuma kingorna INI A/S-imit siunnersuut taparserneqarpoq. Kiisalu Nukissiorfiit tusarniaanermi akissuteqaataat siunnersuummut ilanngunneqarpoq. Aammattaaq tusarniaanermi allakkiaq, inatsisissatut siunnersuummut tunngasoq suliarineqarsimasoq takuuk..

Apeqqu 2. Tusarniaanermi puigorneqarsimasut pissutigalugit tusarniaanermut piffissaq taakkununga sivitsorneqarsimava?

– *Akissut itisileqquneqarpoq.*

Akissut: Akissuteqarnissamut piffissaliusseq sivitsorneqanngilaq, inatsisissatut siunnersuut tusarniaanermilu najoqqutassat annertunngimmata. Tamatuma kingorna piffissaq tusarniaaffiusoq sivitsorneqassappat, inatsisissatut siunnersuutip Inatsisartunut saqqummiunneqarnissaata kinguarternerani akornutissat, aamma piffissap tusarniaaffiusut tusarniaanermi akissuteqarnissaannut sivikillineqarnerani akornutissat nalilersuiffiqineqarput.

Taaguutinut nassuiaatit pillugit

Apeqqu 3. Oqaaseq entreprenørit avataaneersut Naalakkersuisunut nassuiaqquneqarpoq.

– *Aalajangersakkanut ataasiakkaanut oqaaseqaatini nr. 4-mi ima allassimasoqarpoq:*

***Entrepreneørit avataaneersut** suliasamat minnerusumut akunnattumilluunniit angissusillimmut neqerooruteqarsinnaassappata, tamatumani siumoortumik neqerooruteqartitsinngikkaluarluni killilimmik suliariumannittussarsiuussinerup atorneqarnissaanik atuinissamik akornutaasoqartariaqanngitsoq naliliisoqarpoq.*

(Ataatsimiititaliap erseqqissaanera)

Akissut: Inatsisip teknikkimut tunngasortaanut oqaaseqaateqarnermi entreprenørit avataaneersut oqaatigineqarnerini, taamaallaat entreprenørit najukkami najugaqanngitsut eqqarsaatigineqarput. Tassalu entreprenøri avataaneersoq matumani tassaavoq entreprenøri illoqarfimmit allameersoq, entreprenøritut najukkameersutut illoqarfimmi (nunaqarfiinilu) illuliorfiusussami sanaartorfiusussamilu najugaqartuunngitsutut isigineqartoq.

Inatsisissatut siunnersuummi nassuiaatit nalinginnaasut naapertorlugit sumiiffinni arlalippassuarni unammilleqatigiinnerup allanngungaatsiarneranik kinguneqartumik ineriartortoqarsimavoq, pingaartumik illuliorfiternermi sanaartornermilu sanasunut mesterit suliffeqarfiillu ikilingaatsiarsimallutik. Pingaartumillu illoqarfinni minnerni illuliornissamat sanaartornissamullu neqerooruteqartitsisarnermi, neqerooruteqartarnermut inatsimmi tamanut ammasumik neqerooruteqartitsinissamat piumasaqaatit (unammilleqatigiinneq annertunerpaaq anguniarlugu) pissusiviusunut naapertuutinngitsutut misigineqartarput.

Neqerooruteqartitsisoq najukkanik ilisimaarinnittoq siumoortumik isumaqarpat, entreprenørit ikittuunnaat imaluunniit aalajangersimasut – tassalu pingaartumik entreprenørit najugaqavissut - kisimik neqerooruteqarnissamat soqutiginnissasut periarfissaqassasullu, neqerooruteqartitsisup tamanut ammasumik suliariumannittussarsiuussinissaa isumaqartussaannngilaq. Taamatut pisoqartillugu neqerooruteqartitsisoq najukkami neqerooruteqarsinnaasunut toqqaannartumik neqerooruteqartitsiguni ajunnginnerusussaavoq, taamaalillunilu tamanut ammasumik suliariumannittussarsiuussinermi saniatigut allaffissorneq aningaasartuutissallu sipaarsinnaallugit.

Kisiannili inatsisissatut siunnersuummi tamanut ammasumik siumoortumik neqerooruteqartitsinngikkaluarluni killilimmik suliariumannittussarsiuussinerup

imaluunniit neqerooqqusinerup atorneqarsinnaaneriniq annertusititsinissaq siunertarineqanngilaq.

Taamaattumik neqerooruteqartitsisup aallaqqaammut siumoortumik nalunaaruteqartarnissaa, taamaalillunilu soqutiginnittut neqerooruteqarnissamut soqutiginninnerminnik saqqummiusseqqullugit kajumissaarneqartarnissaat piumasaaqatigineqarpoq. Taamatut siumoortumik nalunaaruteqarnissamut piffissaliussap naannginnerani, neqerooruteqarsinnaasut pingasunit amerlanerusut soqutiginninnerminnik nalunaaruteqarpata, inatsisissatut siunnersuut malillugu tamanut ammasumik siumoortumik neqerooruteqartitsinngikkaluarluni killilimmik suliariumannittussarsiuussinerup imaluunniit neqerooqqusinerup atorneqarsinnaaneriniq tunngavissaaruttoqassaaq. Tamatumunnga taarsiullugu neqerooruteqartarnermut inatsimmi neqeroortitsisarnermut maleruagassat isiginiarneqassapput, taakkulu malillugit tamanut ammasumik suliariumannittussarsiuussinikkut imaluunniit siumoortumik neqerooruteqartitsinngikkaluarluni killilimmik suliariumannittussarsiuussinikkut neqeroortitsisoqassaaq.

Suliariumannittussarsiuussisarnerni misillitakkat nalinginnaasut malillugit suliassani minnerusuni akunnattumilluunniit angissusilinni entreprenørit avataaneersut imaluunniit illoqarfinit allaneersut qaqtuguinnaq najugaqavissunut unammillersinnaasarput. Assersuutigalugu entreprenøri avataaneersooq entreprenørimit illoqarfimmi angerlarsimasumit piareersarnermut aningaasartuuteqarnerusussaavoq. Aningaasartuutit taakku sanaartorfiup ilusilerneqarneranut, ikorfalersuinerumut immaqalu sanaartornermut kranimut, maskiinanik pissarsiniarnermut il.il. tunngasuupput. Atortut il.il. pisariaqartut piareersarneqartussat entreprenørip angerlarsimasup tigorianaasarpai, kiisalu entreprenørip illoqarfimmi allameersup naatsorsuinerminut atortunik pisariaqartunik nassiusseqqatartornerlu ilannguttussaavai. Taamaattumik amerlanertigut entreprenøri avataaneersooq najukkani entreprenørinut unammillersinnaassappata, illuliassat sanaartugassallu aalajangersimasumik annertussuseqartariaqarput.

Apeqquut 4. “Nunap immikkoortuani pissutsit” aamma Entreprenørit qaqugukkut tamaani najuqartuunersut Naalakkersuisunut nassuiaqquneqarpoq.

– *Siunnersuummi § 13. Imm. 2-mi ima allassimasoqarpoq:*

*” Imm. 2. Aammattaaq killilimmik suliariumannittussarsiuussinerit siumoortumik neqerooruteqartitsiviunngitsumik ingerlaneqarsinnaapput, **nunap immikkoortuani pissutsit** peqquataallutik **entreprenørit najugaqartut** kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamut § 25 a, imm. 4 naapertorlugu aggersaasoqarsimatillugu.”*
(Ataatsimiititaliap erseqqissaanera)

Akissut: Nunap immikkoortuani pissutsinut tunngatillugu pissutsit nalinginnaasut aammalu immikkut ittut, sumiiffimmi pineqartumi ilisarnaataasut allaaserineqarput. Inatsisissatut siunnersuummi nalinginnaasumik sumiiffimmi siunnerfiusumi sanasut entreprenørilla suliffeqarfiisa akornanni niuernerminni unammilleqatigiinnermilu pissutsit siunnerfigineqarput. Nunap immikkoortuani pissutsit allat, sumiiffimmut, illuliornissamik sanaartornissamilluunniit ingerlatsiviusussamut immikkoortuunersut, aammalu entreprenørip sanaartornissaanut soorunami sunniuteqarsinnaasut pineqarput.

Inatsisissatut siunnersuummi entreprenøri, sumiiffimmi aalajangersimasumi, tassalu illoqarfimmi nunaqarfiinilu ulluinnarni suliassaqarfinnut attuumassuteqartoq tunngaviusumik najugaqavissuuvoq. Pisuni allani entreprenøri najugaqavissoq taanna najukkami avataani sullissisuusinnaavoq, taamaalillunilu entreprenøritut avataaneersutut isigineqarsinnaalluni (tak. apeqqut 3-mut akissut).

Siumoortumik nalunaaruteqartarneq pillugu malittarisassani assersuutigalugu nunap immikkoortuani pissutsit kingunerisaannik entreprenørit neqerooruteqarnissamut soqutiginnittut periarfissaqartullu ikittuinnaatillugit aamma/imaluunniit aalajangersimasuutillugit – pingaarnertut najukkani entreprenørit pineqartillugit – neqerooruteqartitsisup neqerooruteqarsinnaasut akornanni niuerfinnik ujartuinissarpiaa siunertarineqarpoq. Tamatuma saniatigut neqerooruteqartitsisoq ajornanngitsumik neqerooruteqartarnermut inatsimmi siumoortumik neqerooruteqartitsinngikkaluarluni killilimmik suliariumannittussarsiuussinissamut imaluunniit neqerooqqusinissamut piumasaqaatini qanoq inissisimasoqarnersoq paasiniarnissaanut periarfissaqassaaq.

Kingunerisassat pillugit

Apeqqut 5. Siumoortumik neqerooruteqartitsiviunngitsumik periarfissamik atuinerit suliffeqarfinnut qanoq kinguneqassappat?

Akissut: Neqerooruteqartitsisup siunnersuummi nr. 6 naapertorlugu siumoortumik nalunaaruteqartarnissamut piumasaqaat isiginiarsimappagu, tamanna inatsisissatut siunnersuummi siumoortumik neqerooruteqartitsinngikkaluarluni killilimmik suliariumannittussarsiuussinissamut periarfissiisoqarnera suliffeqarfinnut taamatullu neqerooruteqartunut isumaqartussaangilaq.

Neqerooruteqartarnermut inatsit malillugu neqerooruteqartitsisoq siumoortumik tamanut ammasumik neqerooqqusimatillugu, neqerooruteqartitsisoq ullumikkut killilimmik suliariumannittussarsiuussinissamut periarfissaqarpoq, Inatsisissatut siunnersuummi tamanut ammasumik siumoortumik neqerooruteqartitsinngikkaluarluni killilimmik suliariumannittussarsiuussinerup imaluunniit neqerooqqusinerup atorneqarsinnaaneriniq annertusititsinissaq siunertarineqanngilaq. Kisiannili tamanut ammasumik siumoortumik neqerooruteqartitsinngikkaluarluni killilimmik suliariumannittussarsiuussinerup imaluunniit neqerooqqusinerup atorneqarnissaa sioqqullugu – aammalu aatsaat inatsisissatut siunnersuummi piumasaqaatit naammassineqarsimappata – suliat ersarinnerusumik ingerlanneqarnissaasa qulakkeerneqarnissaa siunertarineqarpoq.

Siunnersuummi nr. 4-mi aalajangersakkami (§ 13, imm. 2-mik allanngineq) nunap immikkoortuani pissutsit peqquutaallutik entreprenørit aalajangersimasut – pingaarnertut entreprenørit najugaqavissut – kisimik suliassamik naammassinnissinnaanerit qularnaateqanngitsutut isigineqartillugu siumoortumik neqerooruteqartitsinngikkaluarluni killilimmik suliariumannittussarsiuussisoqarsinnaanissaa siunertarineqarpoq.

Siunnersuut malillugu taamatut killilimmik neqerooruteqartitsineq (siumoortumik neqerooruteqartitsinertaqanngitsumik) neqerooqqusinerlu, tamanna pillugu siumoortumik nalunaaruteqartoqarsimappat taamaallaat atorneqarsinnaavoq. Tassalu siumoortumik nalunaaruteqartarnermi ersarissumik pissusilersornissaq eqqarsaatigineqarpoq, tassungalu tunngatillugu maalaaruteqartoqarsinnaammat erseqqissaatigineqassaaq. Neqerooruteqarsinnaasut imaluunniit inatsisitigut soqutigisaqarsinnaasut allat isumaqarpata, pisumi siumoortumik neqerooruteqartitsinngikkaluarluni killilimmik suliariumannittussarsiuussinerup imaluunniit neqerooqqusinerup atorneqarnissaanik tunngavissaqartoqanngitsaq, tassani pineqartup maalaaruteqarsinnaanissaa ammaanneqarpoq.

Inussiarnersumik inuulluaqqusillunga


Karl Frederik Danielsen



Inatsisartut Sanaartornermut Ataatsimiititaliaat
/ maani

**Illulioortiternermi sanaartornermilu neqerooruteqartitsisarneq pillugu Inatsisartut
inatsisaata allanngortinneqarnissaanik siunnersuut (UKA 2020/23) pillugu
ataatsimiititaliap apeqquteqaataanut akissutit**

05-11-2020
Suliaq nr.: 2020 - 2673
ID nr. 58367354

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Inatsisissatut siunnersuutip matuma siuliani taaneqartup suliarineqarneranut atatillugu Sanaartornermut Ataatsimiititaliaq allakkatigut apeqqutinik, 3. november 2020-mi ullulernerqartunik saqqummiussaqaarpoq, taakkulu siunnersuummi imm. 6-imut, siumoortumik nalunaaruteqartarneq pillugu kapitalimik nutaamik imaqaatumut tunngasuupput.

Tamanna tunngavigalugu Naalakkersuisut kapitalimi pineqartumi aalajangersakkanut tunngaviusut siunertaasullu pillugit isummersuutinik aallarniutaasunik tamanullu tunngasunik saqqummiussinissamut periarfissarsipput.

Siumoortumik nalunaaruteqartarneq kalaallit inatsisaanni nutaaliorneruvoq. Aamma siumoortumik nalunaaruteqartarnermut maleruagassat ilusiligaanerat neqerooruteqartitsisarnermut aalajangersakkanut, nunani amerlanertigut uatsinnut assersuuttakkatsinni ilisimaneqartunut naleqqiullugu nutaaliornerupput.

Siumoortumik nalunaaruteqartarnerit pillugit aalajangersakkat siunnersuummi immikkoortumut 4-mut atalluinnartutut isigineqassapput, taakkulu malillugit najukkani entreprenørit kisimik neqerooruteqarnissaat naatsorsuutigineqarsinnaatillugu, killilimmik suliariumannittussarsiuussisoqarsinnaavoq, aamma siunnersuummi immikkoortoq 5, suliffeqarfiit taamaallaat pingasut tikillugit amerlassusillit illuliassanik sanaartugassanillu sanasinnaappata neqerooqqusineq atorineqarsinnaavoq, tak. siunnersuummi § 25 a, imm. 4.

Siumoortumik neqeroortitsinertaqaqngitsumik neqerooqqusinertaqaqngitsumillu killilimmik suliariumannittussarsiuussinissamut aalajangersakkat nutaat taakku taamaallaat atorineqarsinnaapput, siumoortumik nalunaaruteqarnissamut maleruagassat malillugit suliasamat neqerooruteqartitseriaasissamullu kaammattuisoqarsimappat.

Naliliinerup, siumoortumik neqeroortitsinertaqaqngitsumik neqerooqqusinertaqaqngitsumillu killilimmik suliariumannittussarsiuussinissamik aalajangiinnermut tunngavigineqartup pissusiviusunit allaanerusinnaanera tamatumunnga peqputaavoq. Killilimmik suliariumannittussarsiuussinissamut siumoortumik nalunaaruteqartoqarnerani entreprenørip najugaqavissuunngitsup suliasamat soqutiginnilluni saaffiginnissutaanik takkuttoqarpat, tamatuma kingunerisaanik neqerooruteqartitsinissaq tamanut ammasumik

saqqummiunneqassanersoq neqerooruteqartitsisup eqqarsaatigeqqissavaa, najukkami entreprenørit kisimik suliassamut neqerooruteqartinneqarnissaannut tunngavissaq nalorninarloq immaqalu kukkusuusoq paasinarsisinnaammat. Kisiannili entreprenørip illoqarfiup avataaneersup saaffiginnissutaa naammattumik pimoorussaasutut isikkoqanngitsoq isumaqarfigineqarani siumoortumik neqeroortitsinertaqanngitsumik killilimmik suliariumannittussarsiuussinissaq aalajangiusimaannarpagu, entreprenøri pineqartoq siumoortumik nalunaarutip tamanut ammasumik saqqummiunneqarneraniit sapaatit akunneri sisamat qaangiutsinnagit neqerooruteqartitsinerup ilusaa pillugu maalaaruteqarsinnaavoq, tak. siunnersuummi § 25 a, imm. 6. Siunnersuummi § 25 a, imm. 6 neqeroortitsinerpiamut tunngasuunngilaq, kisiannili taamaallaat siumoortumik nalunaaruteqartarnermut tunngasuulluni.

Neqeroortitsinerpiamut (neqerooqqusinermut imaluunniit siumoortumik neqeroortitsinertaqanngitsumik killilimmik suliariumannittussarsiuussinermut) tunngatillugu maalaaruteqartarnermut, aamma pisortat pisiniartarnerannut neqerooruteqartitsisarnermut maalaaruteqartarfik pillugu Inatsisartut inatsisaanni piffissap maalaaruteqarfiussap naatsorsorneqartarneranut aalajangersakkat nalinginnaasut atuutissapput.

Entrepreneørit sanasullu soqutiginnittut neqerooqqusilluni imaluunniit siumoortumik neqeroortitsinertaqanngitsumik killimmik suliariumannittussarsiuussilluni isumaqatigiissuteqartoqarsimanageranut ilisimasaqartariaqannginnerat tunngavilersuutigineqarsinnaavoq. Kisiannili neqerooruteqartitsinermik taamaattumik ingerlatsisoqarnissaata siunnerfigineqarnera pillugu siumoortumik nalunaaruteqartarnermi suleriaatsimi § 25 a-mi allaaserineqartumi soqutiginnissinnaasut pisuni allani, siumoortumik neqeroortitsinertaqanngitsumik killimmik suliariumannittussarsiuussinermik atuiffiusuni, imaluunniit neqerooqqusilluni neqeroorummik pissarsiniarfiusuni suliap ingerlanera pillugu paasisaqarnissamut periarfissaat pitsaanerulersinnaapput. Maleruagassat atuuttut naapertorlugit siumoortumik neqeroortitsinertaqanngitsumik killimmik suliariumannittussarsiuussineq ingerlanneqarsinnaavoq, neqerooruteqartitsisoq isumaqarpat, entreprenørit aalajangersimasut kisimik suliassap suliarinissaanut naammattunik piginnaasaqartoq, imaluunniit immikkut ittunik pisariaqartitsinneqartunik ilisimasaqartoq. Neqerooruteqartitsisoq taamaattoqartoq isumaqarpat, neqerooruteqartitsisup maleruagassat naapertorlugit tamanut ammasumik saqqummiussinertaqanngitsumik neqerooruteqartitsineq ingerlassinnaavaa. Tamanna aamma neqerooqqusinermi, soorlu neqerooruteqartarnermut inatsimmi maanna atuuttumi § 20, imm. 1, nr. 4 naapertorlugu ingerlanneqartumi, neqerooruteqartitsisup suliffeqarfiup aalajangersimasut kisimi suliassaq naammassisinnaagaa isumaqarfigippagu, imaluunniit nr. 5 naapertorlugu tunngavissat immikkut ittut allat entreprenørip aalajangersimasup toqqarneqarnissaanut pingaaruteqarpata atuutissaq.

Siunnersuutip ilusilernerqarnerani ersarissumik ersittumillu pissuseqarnissaq, aammalu entreprenørip neqerooruteqartitseriaatsinik killilinnik atuinermi piumasaqaatit naammassinneqarsimannngitsut isumaqaruni qisuariarnissamut maalaaruteqarnissamullu periarfissaqarnissaa immikkut ittumik pingartinneqarpoq.

Illuatungaatigut neqerooruteqartitsinerup naapertuuttumik ingerlanneqarnissaa, aammalu suliassap killilimmik neqerooruteqartitsivigineqarnissaanik siunnerfeqarnermik nalunaaruteqarneq pillugu maalaaruteqarnissamut piffissarititaasumik aalajangersaasoqarnissaa pisariaqartutut naliliiffigineqarpoq.

Neqerooruteqartitseriaaserpiaq pillugu maalaaruteqarnissamut piffissarititaasoq kingusinnerusukkumiit, soorlu entreprenørimut sanasumulluunniit toqqarneqartumut isumaqatigiissuteqarnermiit aalajangerneqassappat tamanna suliap ingerlaneranut naapertuutinningsorujussuussaaq, aammalu aningaasaqarnikkut annaasinnaasat amerlinerinik kinguneqarsinnaalluni. Tamanna aamma maalaaruteqartup piffissaagallartillugu maalaaruteqarsinnaanerata qulakkeerneqarnissaanut annikillisisissaaq, neqerooruteqarsinnaasoq, maalaaruteqarnissamik kissaateqartoq piffissaq isumaqatigiissusiorfiusoq pillugu ilisimasaqartariaqartussaangimmat.

Siunnersuummi § 25 a, imm. 4-mi soqutiginnittunik neqerooruteqaqqusisarnerup atuutsinneqalerneranut tunngavilersuut pingaarutilik tassaavoq, neqerooruteqartitsisup taamaalilluni killilimmik neqerooruteqartitseriaatsimut piumasaqaatit atuunnersut naliliiffiginissaannut periarfissaqarnissaa. Tassalu suliassamut, neqerooruteqaqqusinissamik siunertaqarfiusumut ataatsimut sisamat amerlanerusulluunniit neqerooruteqarnissamut soqutiginnillutik nalunaaruteqarpata, taassuma ingerlanera pingaarnertut tassaasariaqarpoq, neqerooruteqartitsisup tamanut ammasumik suliariumannittussarsiuussinermik toqqaanissaa. Taamatuttaaq siumoortumik neqeroortitsinertaqanngitsumik killimmik suliariumannittussarsiuussinermi entreprenørimik illoqarfiup avataaneersumik soqutiginnittoqarpat, suliassap taassuma aamma tamanut ammasumik suliariumannittussarsiuunneqarnissaa orniginarnerussaaq.

Aalajangersakkamut tunngavilersuut pingaarutilik alla soqutiginnissinnaasut kukkusumik tunngaveqarluni taamaalioortoqarneranik isumaqartut neqerooruteqartitseriaaseq pillugu maalaaruteqarsinnaaneranut tunngasuuvoq.

Sanasut entreprenørillaunniit § 25 a, imm. 4 naapertorlugu suliassamut soqutiginninnerminnik takutitsisut tassunga neqerooruteqarnissamut inatsisitigut piumasaqarsinnaanissaat siunertaangilaq.

Assersuutigalugu oqaatigineqassaaq, maanna maleruagassani atuuttuni illuliassat sanaartugassallu katillugit 500.000 koruuninik taakkuluunniit inorlugit nalillit neqerooruteqaqqusilluni suliariumannittussarsiuussinissaa akuerineqarmat, taamaattorli neqerooruteqaqquneqarlutik neqerooruteqartut amerlanerpaamik pingasuussapput. Neqerooruteqartitsinermi ataaseq, marluk pingasulluunniit neqerooruteqaqquneqassanersut neqerooruteqartitsisup aalajangissavaa, tassani sanasut/entreprenørit suliassamik naammassinnissinnaasut arlaqarnerat neqerooruteqartitsisup ilisimagaluarpaguluunniit. Taamatuttaaq neqerooruteqartitsinermi illuliassamut sanaartugassamullu, annertussuseq, pitsaassuseq piffissaliussarlu eqqarsaatigalugit neqerooruteqartitsinermut tunngavissani ajornakusoortorujussuarmik aalajangiiffigineqarsinnaasumut ataaseq, marluk pingasulluunniit neqerooruteqaqquneqassanersut neqerooruteqartitsisup nammineerluni aalajangersinnaavaa, tak. neqerooruteqartarnermut inatsimmi § 20, imm. 1, nr. 2. Aamma tassani sanasut/entreprenørit soqutiginnissinnaasut tamarmik neqerooqquneqarnissaat piumasaqaataangilaq.

Suliffeqarfik sunaluunniit siumoortumik nalunaaruteqarneq tunngavigalugu soqutiginninnerminik nalunaaruteqartoq neqeroornissamut inatsisitigut piumasaqarsinnaassappat, tamanna neqerooruteqartitsisarnermut inatsisit iluanni tunngavissanik nalinginnaasunik uniuinertut isigineqassaaq. Tamatuma saniatigut inatsisitigut isumannaassuseq aamma assigiimmik pinnittarnissamut tunngavissat eqqarsaatigalugit eqqarsarnartoqarpoq.

Matuma kinguliani apeqqutinut saqqummiunneqartunut tulleriinneri malillugit Naalakkersuisut akissuteqaataat saqqummiunneqarput:

Apeqqut 1. Siunnersuut ilusimisut iluseqartillugu neqerooruteqartunik nalingiisitsineq qulakkeerneqanngitsoq Naalakkersuisunit isumaqatigineqarpa?

Akissut: Naalakkersuisut isumaat malillugu siunnersuut ilusimisut iluseqartilluni neqerooruteqartut akornanni assigiimmik pinnittarnermik, neqerooruteqartitsisarnermut maleruagassat atuuttut malillugit siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinermi isiginiagassatut pitsaatigisunik – pitsaanerunngikkunik – imaqartoq. Naalakkersuisut isumaqarput, assigiimmik pinnittarissaq naammattumik toqqissisimanartumillu annertussuseqartut, kinaassusersiunngitsumik assigiimmillu pinninnissamat maleruagassat tamanut atuuttut aqcutigalugit qulakkeeriffigineqartut, tak. neqerooruteqartarnermut inatsimmi § 7, imm. 3.

Suliffeqarfik siumoortumik nalunaaruteqartoqarneranut atatillugu soqutiginninnerminik takutitsiiniarnermini, suliffeqarfiup illuliassamat sanaartugassamullu neqerooruteqarnissamat inatsisit tunngavigalugit piumasaqarsinnaanissaa Naalakkersuisunit eqqarsarnartoqartinneqarpoq. Tamanut ammasumik suliariumannittussarsiuussinermi neqerooruteqarnissamat piumasaqaatit minnerpaaffissaat nalinginnaasut saqqummiunneqartarput, taakkunungalugu ilanngullugu neqerooruteqartup 100.000 koruunit sinnerlugit pisortanut akiitsoqannginnissaata piumasaqaatigineqartarnera nalinginnaasuvoq. Tamatumani saniatigut neqerooruteqartup aningaasaqarnikkut akiliisinnaassuseqarnissaanik neqerooruteqartitsisup qulakkeerisinnaanissaa kissaatigineqarpoq, neqerooruteqartoq qularnaveeqqusiinissamat uppersaasartussaammat. Soorunami piumasaqaatit taamaattut siumoortumik nalunaaruteqarnermi saqqummiunneqarsinnaanngillat. Taamaallilluni suliffeqarfiup, pisortat suliassaataannik tunineqarnissamat piumasaqaatit minnerpaaffissaanik naammassinnissinnaanngikkuni neqerooruteqartunut ilaatinngitsoorneqarsinnaanissamat periarfissaqanngitsoornissaa annertusissaaq.

Apeqqut 2. Siunnersuut ilusimisut iluseqartillugu neqerooruteqarnermi maalaaruteqarsinnaanermut periarfissanik killiliisoq Naalakkersuisunit isumaqatigineqarpa?

Akissut: Naalakkersuisut isumaqarput, siunnersuut ilusimisut iluseqartilluni neqerooruteqarnermi maalaaruteqarsinnaanermik pitsannguiffiusoq. Maleruagassat atuuttut malillugit siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuussinissamat soqutiginnissinnaasut taamaallaat tunniussinissamat aalajangiineq pillugu maalaaruteqarnissamat periarfissaqarput. Tunniussineq pillugu aalajangiinernut maalaaruteqarsinnaatitaaneq siunnersuummi allanngortinneqanngilaq.

Siunnersuut soqutiginnittut suliassap siumoortumik neqeroortitsinertaqanngitsumik neqerooqqusinertaqanngitsumillu killilimmik suliariumannittussarsiuunneqarnissaanik siumoortumik nalunaarut pillugu maalaaruteqarsinnaanernut tapiliussamik ilaneqarpoq.

Ataatsimut isigalugu maalaaruteqarsinnaaneq annertusineqarpoq.

Apeqquut 3. Neqerooruteqarnissamut soqutiginnittunik tamanik neqeroortitsineq naligiisitsinermik qulakkeerinnissasoq Naalakkersuisunit isumaqatigineqarpa? Siumoortumik nalunaaruteqartarnissaq tunngavigalugu amerlanerpaamik pingasut neqerooruteqartut pineqarput.

Akissut: Sanasut/entreprenørit suliassamut soqutiginninnerminnik saqqummiussisut tamarmik neqerooruteqaaqquneqarnerini, nalinginnaasumik assigiimmik pineqarnissamut qulakkeerinniffeqineqartassasut Naalakkersuisunit isumaqatigineqarpoq.

Tamatuma peqatigisaanik suliffeqarfii pisortanik amerlasuunik akiitsullit, imaluunniit suliffeqarfii qularnaveeqqusiinissamut aningaasaqarnikkut piginnaanikinnerusut neqerooruteqarnissamut inatsisitigut piumasaqarfigineqarnissaat ilimanaateqarpoq.

Apeqquut 4. § 25 a, imm. 5 allanngortinneratigut naligiisitsineq qulakkeerneqarsinnaava., taamaalilluni 'sinnaavoq' 'sussaavoq'-mik taarserlugu oqaaseqatigiillu 'tamatumani saniatigut inatsisitigut piumasaqaateqarsinnaannginnerat' peerlugu?

- a. Neqerooruteqartitsinermi allaffissornikkut annikinnerusunik aningaasartuuteqartoqalerneranik malitseqarnissaa Naalakkersuisunit isumaqatigineqarpa?**

Akissut: Neqerooruteqartut akornanni assigiimmik pinninnissaq matuma siuliani taaneqartoq apeqqummi allaaserineqartutut anguneqarsinnaasoq Naalakkersuisunit isumaqatigineqarpoq. Tassunga tunngatillugu Naalakkersuisut isumaqatigaat, allannguneq neqeroortitsinermi allaffissornermut aningaasartuutit amerlanerulernerinik kinguneqassanngitsaq.

Kisiannili matuma siuliani eqqaallatsiarneqartutut, neqerooruteqarnissamut soqutiginnittut tamarmik inatsisitigut taamatut piumasaqarsinnaanerat eqqarsarnartoqartinneqarpoq, taamatullu inatsisitigut piumasaqarsinnaaneq tunngavissanut, maleruagassani atuuttuni siumoortumik neqeroortitsinertaqaanngitsumik neqerooqqusinertaqaanngitsumillu killilimmik suliariumannitussarsiuussinissamut nammattuusunut tamakkiisumik naapertuuttutut isigineqaanngillat. Matuma siuliani oqaaseqaatinut, tamanut itisiliiffiusunut innersuussisoqarpoq.

Apeqquut 5. Apeqquutit sisamaanni siunnersuutigineqartunut unammilligassanut Naalakkersuisut allanik aaqiissutissanik takusaqarsinnaava?

Akissut: Naalakkersuisut isumaqarput, siunnersuut allanngortinneqassappat, taamaalillunilu neqerooruteqartut soqutiginninnerminnik nalunaaruteqartut tamarmik neqerooruteqarnissamut inatsisitigut piumasaqarsinnaasunngorlugit siunnersuut allanngortinneqassappat, apeqqut 4-mi aaqiissutissatut innersuunneqartoq ilanegaartariaqartoq, taamaalillunilu soqutiginnittut pineqartut ilaatigut ukuningga ilanngussillutik nassiuussisassasut,

- Akileraartarnermut Aqutsisoqarfimmiit nalunaarut, pisortanut amerlasuunik akiitsoqaannginnermut uppernarsaataasoq, ilaatigut
- aningaaserivimmit assigisaannillu nalunaarut, pineqartup suliassap suliarinissaanut qularnaveeqqusiinnaaneranik naliliiffiusaq.

Kingulliullugu taaneqartoq immikkut ittumik unamillertitsisinnaavoq, neqeroorummut aningaasartassarititaasut amerlassusissaat ilisimaneqartussaangimmat, taamatullu suliassat suliarineqarnissaanut piffissaq ilisimaneqartussaananani. Aamma tassunga tunngatiglugu erseqqissaatigineqassaaq, neqeroorummut aningaasartassarititaasut imaluunniit suliassami missingersuutitut sinaakktissat amerlassusissaat pillugit paasissutissiineq marlunnt avitanik aningaasaliisarnermut uniuummat.

Taamatut nalunaaruteqarnissamut piumasaqarneq qularnanngitsumik neqerooruteqarnissamut soqutiginnissinnaasut arlallit soqutiginninnerminnik nalunaaruteqanngitsoortarnerinik kinguneqartussaavoq, suliassaasinnaasunut piffissami siusissumi tassani tamanna ajornakusoormat.

Naggasiutigalugu ataatsimiititaliaq inatsisissatut siunnersuummik peqqissaarussilluni suliagarneranut, aammalu siunnersuutip imaanik itisiliinissamut periarfissinneqarnermut qutsavigaara.

Inussiarnersumik inuulluaqqusillunga



Karl Frederik Danielsen